

honne589

Summerdaache

Merr dut su vill iwver die Klimaerwärmung lese odder heern, die in de nächste 30 Johrn kumme soll, awwer isch moon, die wär schunn doo.

Kennderr eisch noch erinnern, wie vor ach was waaß isch wie vill Johr de Rudi Carrell gesunge hott:

*Wann wirds mal wieder richtig Sommer,
ein Sommer wie er früher einmal war.*

*Ja, mit Sonnenschein von Juni bis September
und nicht so nass und so sibirisch wie im letzten Jahr.*

Die Zeide, als de Rudi unn aach mir de Summer gesucht hawwe, sinn längst vorbei, im Geeschedeil. Die Summer fonge im Juni oo unn giehn bis in de September enoi, unn allsfort mett heiße Daache unn Nächte beiere Hitz vunn 30 Grad unn mieh; im Audo sinns, wennde koo Garaasch host, bald 40 Grad. Mir all werrn uns uff Summer ohne korrzes End oistelle misse unn doodruff, dass dess jetz jed Johr su werdd.

Bei de junge Leit gieht dess mett de Hitz villeischd noch ohne Probleme, awwer mir Äldere werrn gons schee mettere belast. Vill trinke, heeßt dess joo immer, awwer ess iss joo aach bekonnd, dass merr im Alder wenischer Dorschd hott, vunn Ausnahme abgeseh. Aach muss merr fruh soi, wenn merr Kinner odder Enkel hott, die oom die Getränke ins Haus odder in die Wohnung brenge; wennde die nitt host, donn mussde derr Wasser unn Äbbelwoi bestelle unn hoombrenge losse, awwer doo duts gude Firma in Flerschem gewwe, die dess gern ferr disch mache.

Unn weil die Wärm aach immer mieh in de hohe Norde zieht, hächt die dort mittlerweile de stärksde Eskimo vumm Schlitte, also de stärksde Inuit vumm Schneemobil.

Eiern Honnes